

# Corporaziun Evangelica Zernez

**Radunanza generala da marcurdi, ils 7 october 2020, a las 20:00h illa baselgia gronda a Zernez**

Preschaints: 16 personas cun dret da vuschar

S-chüsats: Rahel Schreich, Arno Felix, Riet Felix, Seraina Bickel, Oscar Cuorad e Ulrica Guidon

## Tractandas

1. Tscherna dals scrutinadurs
2. Protocol da la radunanza generala a Zernez dals 24 avrigl 2019
3. Rapport annual dal president 2019
4. Rendaquint 2019 e rapport dals revisurs da quint
5. Preventiv 2020
6. Fixar il pè d'impostas da la baselgia per l'on 2021
7. Tschernas: Elecziun d'ün(a) nouv(a) commember (-ra) dal consistori  
Elecziun da duos revisurs(as) da quint
8. Approvaziun dals Statüts da la regiun da baselgia Engiadina Bassa e Val Müstair
9. Orientaziuns
10. Varia

Bivgnaint dal president e meditaziun e coral nomer 12

Il president Hermann Thom da il bivgnaint a las votantas ed ils votants.

El surdà il pled a nos ravarenda Rainer Grabowski per üna cuorta meditaziun.

Rainer piglia il pled e fa üna cuorta meditaziun sur dal minchadi e sias bellas e greivas aventüras. Rainer giavüscha a tuots üna bella e buna radunanza cun bunas discussiuns.

A la fin da la meditaziun dudin nus il coral nomer 12 suna da Christa Pinggera al Orgel ed accumpagnà da computer, cun quai cha causa il Corona virus nus das-cha chantar.

## **1. Tscherna dals scrutinadurs**

Hermann propuona da tour sco scrutinadurs ad Anna Kirchen ed a Lucrezia Schorta, ellas han tuottas duos üna piazza cun buna survista sur da tuot ils votants.

## **2. Protocol da la radunanza generala a Zernez dals 24 avrigl 2019**

Il protocol nu vain plü prelet el es stat expost in differents lös ed eir sülla pagina dad internet da la corporaziun evangelica. Il protocol vain fat bun sco expost sainza cuntravusch.

## **3. Rapport annual dal president 2019**

La radunanza piglia cogniziun dal rapport dal president. Il president Hermann Thom prelegia seis rapport annual.

*Charas preschaintas, chars preschaints*

*No vain avant discus - e fat bun, il protocol da la radunanza generala dals 24 avrigl 2019. Eu less però cumanzar meis rapport ün pa avant. Nempe la fin d'avuost 2018 cur cha mia antecessura ha annunzchà in üna sezzüda da suprastanza sia demischiun. Ella vaiva declerà ch'ella vöglia far quai per amur da la pasch in nossa raspada.*

*Eu sco vicepresidente ed actuar n'ha lura fingià surtut tschertas lezchas. Üna vouta il presidi d'üna cumischiun chi vaiva da surlavurar la piazza dal ravarenda ed adattar quella uschè cha nos ravarenda nu füss stat massa surchargià e lura il contact cul ravarenda. La cumischiun vaiva lura accumulì tuot las pretaisas dal ravarenda, cur cha quel ha ils prüms dis da schner, listess amo demischiunà.*

*Davo ha per mai però cumanzà pür inandret quel temp, per il qual la fotografia da la baselgia sco plazzal da fabrica es fich significativa. In üna dieta da nos consistori manada da persunas professunalas da baselgia refuormada chantunala vain amo üna jada surlavurà e valütà nossas aspettativas invers ün ravarenda, il quadern da lavur pel ravarenda ed insomma las estructuras da nossa raspada. I s'ha muossà cha nossas imaginaziuns d'eiran insè tuot realistics.*

*Id ha lura cumanzà la tschercha d'ün ravarenda. Eir quai üna fatschenda na uschè simpla. A ravarendas Grischuns chi vessan vulgü s'annunzchar per la piazza d'eira da quel temp gnü davo via scusglià da s'annunzchar per la piazza a Zernez.*

*Da trais annunzchas cha no vaivan lura listess amo surgni s'han duos demuossadas valablas. Üna es lura gnüda tratta inavo e la segunda persuna – ün ravarenda creschü sü ad Arosa chi vaiva pür davo avair lavurà blers ons in ün oter manster fat il stüdi da teologia, es stat as preschantar ed es gnü tschernü.*

*Sco cha nus vain orientà aint La Punt s'ha lura eir el retrat da la tscherna, causa sia famiglia, e no vain cumanzà pro nolla.*

Pro la segunda runda nun haja dat bod ingünas annunzchas valablas. Pür l'ultim mumaint es gnüda l'annunzcha da Ravarenda Rainer Grabowski. Inse ans d'eiran la fin da settember tant inavant da perüna cha el vögliä gnir pro nus - e nus vessan gugent ad el. Nus vain però subit vis cha üna tscherna be uschè nu vaja a far, causa cha las pretaisas da la baselgia chantunala nun sun bod na d'accumplir. Ravarenda Grabowski ha lura però dat tuot - ed ha pass a pass accumpli tuot las pretaisas, uschè cha in marz vain pudü tscherner ad el - ed in mai d'ürant il lockdown da Corona es el rivà a Zernez.

Quai d'eira be il plazzal da fabrica il plü important. Dasper quai, ha la raspada gnü da funcziunar eir sainza ravarenda. Id es stat da far plans da predgia e tscherchar per mincha dumengia inchün chi vegn a far la predgia. Id es stat da verer co far cull'instrucziun da religiun sül s-chalin ot ed id es stat da verer co far culs preparands ed ils confirmands e quai tuot sper la lavur cha ün consistori fa eir inschinà d'ürant quels ons ingiò cha tuot quist funcziuna da sai. In quist lö lessa ingrazchar a duonna Corine Dittes e nossa raspada vaschina in Engiadin'Ota chi han güdà cun las uras da confirmands e la Confirmaziun. Ün fich grond ingrazchamaint va a ravarenda Anette Jungen chi'd est statta pronta da güdar oura da november fin la fin da marz cun ün pensum da 30 pertschient. Cun quels 30 pertschient ha ella fat fich bler, bler daplü co quai cha no vessan pensà davo las experiencias fattas l'on avant.

Bler da quai chi nun es stat pussibel dad organisar otramaing n'haja fat sves. Eu stögl dir cha per mai esa stat plü bel d'ürant ils mais ch'eu vaiva be blera lavur, però inschinà mia pasch, in congual cun quels mais ch'eu vaiva da far la lavur ed eir amo da giovar la rolla d'ün da quels chi ha fat tuot suotsura cul ravarenda. Il ravarenda Patrick Brand ha bandunà in lügl dal 2019 quista raspada perche cha **el** ha decis da far quai. Ad el giavüscha tuot il bun per seis avegnir ed a nossa raspada giavüscha surtuot da pudair viver in pasch.

La fotografia cha vus vezzais, muossa la Baselgia San Jon a Susch d'ürant la renovaziun da la fatschada da prümavaira dal 2019. Cun quai es lura statta a fin quella renovaziun chi d'eira gnüda decisa amo avant la fusiun e pervia da quai, eir finanziada cun **üna** plü gronda pertschientuala da la baselgia chantunala. Da far reparaturas e mantegnimaint esa stat eir pro la baselgia da Brail. Però per tuot la roba regulara nu vaina bod na temp in quist rapport. Tuot la lavur e l'organisaziun cha'l virus da Corona ha chaschunà possa per furtüna quintar l'on chi vain.

Be tant esa però da dir: La Confirmaziun ha gnü lö in üna fuorma cha nossas Confirmandas e nos Confirmands **nun** han gnü da patir eir amo quel di suot il virus chi tils vaiva fingià ruinà l'ultim on da scoula. I d'eiran 6 confirmandas e 4 confirmands. Dal 2019 d'eiran stats 5 confirmands. Battaisems haja dat in nossa raspada daspö l'ultima radunanza generala: 5, Nozzas haja dat: 5, e Funarals vaina gnü: 10. Eu less ingrazchar a tuot las famiglias chi han gnü casualias d'ürant la vacanza da ravarenda e d'ürant il temp da corona per lur incletta chi'd es stat quist on tuot ün pa plü cumplichà.



*I dess sgüra amo oter da dir sur da quist on nar chi ha dürà fin hoz ün on e mez, saja quai da tuot quai chi ha stuvü gnir spostà e sdit giò **chi ha dat** blera lavur pel giat. Sco viadis cun preparands e cun seniors o il di da schoppa ed oter plü. Però bler plü gugent lessa almain be cuort manzunar ils bels inscunters in nossa raspada. Sco las predgias da la festa da la raccolta cun partecipaziun dals uffants, la predgia **da la prüma dumengia** d'Advent culs preparands e confirmands o la predgia da Chalandamarz, ingio cha ün per uffants sun gnüts eir sainza chi han stuvü. I sun las bellas chosas in nossa cumünanza chi dan forza e motiveschan eir a mai sco president da far la lavur in quista raspada.*

*Plaschair faja eir dad avair darcheu ün ravarenda in nossa raspada El ha tut bler sün sai per gnir pro nus e nus ans vain chattats e sperain cha quista vouta saja quai qualchosa per ün temp plü lung. Per exaimpel la müdada ch'el e sia famiglia han fat da la Germania a Zernez ha chaschunà gronds cuosts. Precis ils raps per quels cuosts ha il consistori decis dad imprastar al ravarenda e da far ün contrat chi til lià ün pa vi da nossa raspada. Minch'on ch'el resta ravarenda a Zernez vegn relaschada üna part da quel impraist. Sch'el invezza vess da'ns bandunar d'ürant ils prossems 12 ons, ha el da pagar inavo il reist da l'impraist. Sperar cha quist saja alch per plü lung temp, fan eir il fat chi'd es qua üna famiglia intera chi as chasa aint a Zernez e chi gniss darcheu schraischada pro ün müdamaint.*

*In mincha cas giavüscha a nos ravarenda, a nossa raspada ed eir a mai e tuot il consistori cha uossa survgnina ün per ons plü simpels sco ils ultims duos ons chi sun passats.*

*L'ultim resta da dir grazcha fich a tuottas e tuot quels chi han güdà e chi s'han ingaschats per nossa raspada e nossa cumünanza. Dals ravarendas chi sun gnüts a güdar oura sur tuot quels chi sun impiegats pro la raspada e chi muossan bler ingaschamaint eir amo sper lur impiegis. Fin pro tuot quels chi güdan adüna pro a la reuschida da tuot quai cha no organisain per exaimpel cun far schoppa e cur chi vegn sdit giò il di da schoppa cun scumpartir quella als seniors o simplamaing be cun far üna tuorta o cun cleger ün püschel fluors. Dir grazcha lessa eir simplamaing eir be per la cumünanza cordiala cha vus e nus eschan buns da fuormar insembel.*

*Grazcha fich a Tuots.*

#### **4. Rendaquint 2019 e rapport dals revisurs da quint**

Hermann da il pled a Claudia Duschletta ella preschainta il quint da gestiun ed il bilantsch per l'on 2019 e declera divers detagls. Il quint da gestiun da la raspada serra cun ün guadogn da 25'891.78 CHF.

La facultà nouva da la raspada as summa per la fin da l'on 2019 a 983'7771.36 CHF inclusiv contos specials.

La revisura Lucrezia Schorta-Thom legia avant il rapport dals revisurs da quint. Seis collega chi ha fat cun ella la revisiun, Arno Felix, s'ha s-chüsà per quista saira. I'l rapport es scrit cha tuot es in bun uorden e manà tenor las pretaisas. Ils revisurs da quint propuonan dad approvar il quint e da dar dis-charg als organs respunsabels. La radunanza segua a quella proposta sainza cuntravusch.

## **5. Preventiv 2020**

Claudia Duschletta preschainta il preventiv per l'on 2020, e sta a disposiziun per dumondas. Il preventiv chi prevezza per l'on 2020 ün pitschen guadogn vain approvà unanim.

Il president as ingrazcha pro Claudia ed ils revisurs da quint. Hermann infuormescha cha Arno Felix ja demischiunà e cha Ricardo Weingart es i davent a star e ha tut sias scrittüras cun sai uschè cha el sto dar giò seis post sco revisur da quint.

## **6. Fixar il pè d'impostas da la baselgia per l'on 2021**

La proposta dal consistori es quella da laschar il pè d'imposta sco fin qua, pro 18.5% da l'imposta simpla dal chantun Grischun. Quel as metta insembel da 15% imposta da baselgia per la raspada e 3.5% imposta per l'egualisaziun chantunala. La proposta vain approvada da la radunanza cun unanimità da vuschs.

## **7. Tschernas:**

Hermann ingrazcha ad Esther Christoffel per tuot sia lavur cha ella ha fat e cha ella es statta pronta da surtrar quai per ün on e mez causa cha l'on passa es sorti fingià la presidenta da Zernez e no sco consistori vain dumonda ad Esther scha ella füss pronta da far amo ün on chi nu sortan güsta tuot ils commembers dal consistori da Zernez al listess mumaint. Davo vaina amo stuvü spostar la radunanza generala per ün mez on causa il virus Corona.

No vain lura scrit oura illa Punt la piazza da consistori e dumonda intuorn a differenta gliedud ma lösch sainza success fina cha Monica Stupan as ha lura annunzchada pro Hermann e vaiva gust ed interess da far part aint il consistori.

### **Elecziun d'ün(a) nouv(a) commember (-ra) dal consistori**

Il consistori ha tscherchè candidats e candidatas ed ha chattà a Monica Stupan da Zernez chi as metta a disposiziun per quist post.

Hermann dumonda schi dà amo otras propostas o scha inchün es pront da far la proposta da far l'elecziun sainza scrutin? Hilda Thom as annunzcha e fa la proposta da far sainza scrutin, e tuot ils preschaints sun perinclets.

Monica Stupan vain eletta da la radunanza cun unanimità da vuschs e cun applaus.

### **Elecziun da duos revisurs(as) da quint**

Il consistori ha tscherchè duos candidats e candidatas per revisurs da quint a disposiziun as han miss Esther Christoffel e Riet Felix per quist duos post averts.

Hermann fa eir quista jada la dumonda davu ulteriuras propostas per candidats o scha inchün es pront da far la proposta dad eleger sainza scrutin? Nuot Filli as annunzcha e fa la proposta da far sainza scrutin, e tuot ils preschaints sun per inclets.

Eir Esther Christoffel e Riet Felix vegnan elets da la radunanza cun unanimità da vuschs e cun applaus.

## **8. Approvaziun dals Statüts da la regiun da baselgia Engiadina Bassa e Val Müstair**

Il president declera per che chi va suot quista tractanda ed el declera eir la lezcha dal Colloqui. Il Colloqui nu vaiva tenor la constituziun veglia da la Baselgia chantunala adüna be be la funcziun dad ün organ vers amunt per far consultaziuns e na vers aval. Uossa cun la constituziun nouva as vögla müdar quai per eir pudair surtour lezchas regiunalas sco las predgias illas chasas d'asil o chi's fa alch insembel per exaimpel alch culs o perl' s confirmands. Il consistori da Zernez as ha ingaschè chi'd es pussibel per mincha raspada da tour part o schi nus vögl lura bain na, e chi's partecipeschan lura vi dals cuors per ils singuls progets be quellas raspadas chi fan part e han interess.

Hermann legia avant ils statüts.

(Statüts)

Il president manzuna cha pro quistas regiuns ecclesiasticas esa da decider in radunanza schi's vess jent da far part o na. Vess la raspada jent da decider quai ossa in quista sezzüda o bain da far üna speciala?

Jack Pinggera dumonda amo na jada da leger avant e declerar ils singuls artichels. Hermann legia giò ils artichels amo üna jada e declera in tudais-ch.

Nuot Filli disch chi saja greiv da decider sainza pudair legier tras e stübgjar plü precis ils statüts.

Brigitta Arquint dumonda che cha no decidessan lura uossa concret?

Hermann declera amo na jada chi's po dar lezchas per la regiun cha üna raspada singula nu rivess da far. Lezchas nu daja intant amo ningünas. Intant eschan be per decider la basa juridica per pudair inamöd far part pro quista regiun. Mincha raspada decida savessa schi's vögl far part als proget singuls da la regiun o bain na.

Illa radunanza vaina decis da vuschar giò e quai eir avert be sainza scrutin.

Il president dumonda scha no sco raspada lain far part da la regiun? I vain vuscha giò per far part cun üna cuntravusch e üna abstenziun.

Il president dumonda scha no approvain ils statüts? I vain vuscha giò per approvar ils statüts cun trais abstenziuns.

Cun quai cha fina ossa faivan part dal colloqui Hermann ed Ottilia fa il president la proposta cha quai resta eir inavant uschè, Ottilia Godly e Hermann Thom sco delegats da nossa raspada.

I vain lura fatta la votumaziun averta e vuscha giò unanim per Ottilia a Hermann.

## **9. Orientaziuns**

Dals 21-25 dad october füss planisà il viadi a Firenze culs confirmands, üna famiglia ha però fingià dit cha lur uffant nu gniss, uossa spettaina giò fina prossem mardi e lura vegna decis, cullas familias schi's voul far o na causa tuot la situaziun da Corona.



## Chantar e Soncha tschaina

In baselgia pro'ls catolics vegna chantà ed id es gnü chantà eir in baselgia a Zernez. Differentas Vuschs as han annunzcha pro Rainer Grabowski ed eir pro Hermann Thom chi nus saintan uschè plü sgürs, schi gnia chantà uossa cun tuot la situaziun dal Corona. Il president manzuna amo na jada chi'd es propa giavüschà da na chantar e das tgnair vi da las prescripziuns da la baselgia chantunala.

Soncha tschaina, a la festa da la raccolta nun esa puchadamaing neir na pussibel da far la soncha tschaina cun quai chi nu pon uschè gnir tgnüdas aint las descripziuns da sgürezza dal Corona. A Nadal esa lura darcheu da verer e decider da nouv o chi's chattess forza üna outra soluziun, pel mumaint restaina pro quai cha no vain decis sainza soncha tschaina e sainza chant. A la festa da raccolta nun esa quist on neir na pussibel da far culs scolars insembel cun quai cha la scoula ha eir prescripziuns da sgürezza dal Corona. Id es però ün pêr dals preparands chi faran part al cult divin da la raccolta a Brail ed a Zernez.

Il battaisem chi füss eir statt quella dumengia da la festa da raccolta hana sdit giò, els lessan far pür prosma prümavaira.

Pro'l sistem da l'otpledader illa baselgia pitschna da Zernez San Bastian ha Hermann guardà schi's pudess far alch sco a Susch e a cas laschar montar novs amplifichadur. Forza esa pussibel da müdar oura be üna part da las robas e spargnar uschè pro'ls cuosts.

Hermann legia amo avant las differentas collectas chi sun gnüdas aint cha Nuot ha dombrà e paja aint adüna sün banca, ün grazia fich eir a tai Nuot.

### **10. Varia**

Jack dumonda schi nu füss pussibel da far ün plan cun tuot las activitats da la baselgia sur tuot on e da dar oura el simplamaing cun datas provisoricas chi nun ian a perder las «üsanças» da las differentas occurrenzas uossa cul Corona chi's sto bod laschar crodar oura tuot.

Hermann declera cha ils termins ütils füssan tuots fingià fats e cha no dain in mincha cas oura quai illa Punt adüna, chi sia üna pussibilità da na far quai be pels prossems trais mais dimpersè per tuot l'on.

Il president dumonda scha inchün ha amo alch suot varia, ningün nus annunzcha plü.

Christa suna il coral final per nossa radunanza generala.

Rainer Grabowski preschainta ad el ed a sia famiglia cun üna pitschna preschantaziun sül beamer da differentas bellas fotografias.

Quist on nun esa displaschaivelmaing na pussibel da far ün aperitiv davo la radunanza, Flurina scumparta però a minchün amo ün pitschen toc tuorta da nus ch cun ir our da porta e no sperain uschè cha gnivat eir il prossem on darcheu a radunanza generala 😊

Serra la sezzüda las 22:15h

In buna fai, l'actuara Flurina Walter.

